

## Leames per se tegnir i joegn te Fascia

La Procuradora Cristina Donei à prejentà doi projec ouc ai joegn per i didèr a scola e per schivèr la "fuga di cervelli" fascegn

**Joegn** - Tel chèder de la dezijion de ge dedichèr l'2012 a la formazion dal pont de veduda sozièl, economich, ambientèl e per duta la desvalives clasc de età, enstadì l'é stat rejonà de la lingia de projec pervedui per l'an che vegn e prejentà i prumes doi jà envié via. L'prum, "Ensema amò più bel", l se ouc ai joegn de la mesènes; l'auter, "Leames: en rei con tia val" l'é stat pissà per i joegn che fèsc e che à fat l'università.

### Ensema amò più bel

L'projet "Ensema amò più bel", prejentà en lunsch ai 28 te la Sorastanza a Poza, l'é nasciù dal Comun general en colaborazion col Servije Sozièl del CGE, la Scola Ladina e l'Decanat de Fascia, e l'vegn portà dant da la Coprativa sozièla da Trent "Projet92" consenta enca a Ciavaleis. L'obietif l'é chel potenzièr l' didament ai genitores e ai joegn de noscia val, metan en doura la Lege Provinzièla sul benesser de la families. L'projet, a chel che se pel se scriver ite debant, l'ha l'fin de ge meter apede ai joegn de la scola mesènes n sostegn per l'endrez di percors de studie e di doveres che ge vegn dat per cèsa. Se trata de 2 ores en setemèna, fac con Biju e Karin de la Coprativa "Projet92", te oratorie de Poza e te la scola mesènes de Moena e de Ciampedel, olache i bec pel esser didé tel studie. I oraries é stac fat aldò del servije publiche e enca per chest i genitores che era a la prezentazion, che i à jà fies che à tacà a tor pèrt a la lezion, i à palesà aprijiamet e sodesfazion per la scomenzadiva, sostegnuda con forza da la Procuradora.

### Leames: en rei con tia val

Prejentà en vender ai 2 de december, l'projet l'é dassen inovatif, l'prum de chesta sort no demò te val ma enca tel Trentin e adertura te la Tèlia.

Sia emportanza é stata sottrissèda da la Procuradora Cristina Donei, da la Conseiera de parità Eleonora Stenico, da la professora Claudia Mammani, cognosciuda te Val per la colaborazion con la Scola de Fascia, da la Sorastant Mirella Florian, dal Vizeprocudador Mariano Cloch e dai joegn che à tout pèrt a la scontrèda.



La Conseiera de parità, Eleonora Stenico, la professora Claudia Mammani, e la Procuradora Cristina Donei endèna la prezentazion.

Prejentà apontin da Claudia Mammani, l'projet l se met dant de investir sui joegn e si talenc. Contra la "fuga di cervelli" da noscia valèdes, percheche l'é giust che i joegn vae a studièr e fèr esperienzes foradecà, ma l'é giust e fossa bel che i vegne de retorn per portèr chiò chel che i à emparà e dèr n contribut inovatif e na crescimonìa a duta Fascia.

I obietives metui dant dal projet Leames, che tol ite 825 joegn fascegn, l'é prum de dut che l'joen sie fascinà da la possibilitèdes de vita e de lurier de Fascia. Dapò ge vegnarà dat maor lèrga tras l'protagonism di joegn enstesc tel ciamp sozièl, del lurier e culturèl, con n'atenzion particulèra per la femenès. L'terz obietif l'é didèr l'joen a cerner sie davegnir universitarie, acioche l' sapie se orientèr su la basa de la possibilitèdes de lurier che l'é te Fascia.

Per arjonjer chest l'é stat pissà de se mever con n sistem spezfich. Donca con n maor dialogh e meisa torones anter joegn, amistradores e operadores sozio - economics, e dapò meter ensema na lista de duc i joegn che é jic o che va a l'università, percheche se podesse aer na statistica de sia cernudes e de si enteresc.

Chest l'é l' scomenz de na rei de colaborazion percacenta sul teritorie che, desche duta la Tèlia, l'padesc la "privazion" de si fies, a descapit de la comunanza e enca di joegn enstesc. Ejempies positives del fenomen del "rientro dei cervelli", enca chiò te Fascia, ne fèsc entener l'emportanza del projet. Te na intervista sun chest sfòj, Fiorenzo Perathoner ne aea dit che sia capacità più grana, che à portà a l'inovazion ti impianc portamont,

la é vegnuda dal fat che l'aea portà te Fascia chel che l'aea vedù e emparà foradecà; e endèna la prezentazion de Leames l'é stat fat l'ejempie de Gianni Rasom da Vich, enegner informatiche chiamà ite da Londra per lurèr per l' Dolomiti Superski.

Endèna la prezentazion l'é stat prejentà doi scomenzadives de valuta outes a la formazion di joegn.

### Joegn protagonisc del lurier

Portà dant da Susanna Chiocchetti, referenta tecnica del Pian joegn de zona "La Risola", l'projet che apontin La Risola metarà a la leta de duc i joegn de Fascia vel fèr rejonèr de lurier i joegn, per ge dèr l'met de aer na miòr cognoscenza e n sostegn te la enrescida del lurier e per l' miorament de sia condizion per chi che à ja n lurier. L' cors perveit n campus de dotrei dis che didarà i joegn a se cognoscer miec e dò desvalives momenc per tratèr i temes de "autoimprenditorialità" e "business plan" e per scontrèr testamonesc del mond economich te Fascia.

### Cors de politica

Prejentà da Teresa Lorenz, l' Cors de politica de la UAL che à serà sù ai 28 de november sia terza edizion l'é l' soul ejempie te Fascia de formazion politica per i joegn. Portan te val desvalives personages de nonzech del mond del derit, de la politica e de l'economia, chest cors à metù a la leta na ocajon de arichiment cultural e personèl emportant per entener miec la realtà de duc i dis, de noscia val, del Trentin e del mond. (vr)

## L Cianton de l'Istitut

### Piccola rubrica de informazion culturèla

## Radunanza de l'Istitut Ladin e inaudazion de la neva sala del Museo dedichèda ai tempes neves

En ocajon de la radunanza anuèla de l'Istitut Cultural Ladin de Sèn Jan, programèda per en saba da ai 10 de december da les 17.00 te Museo Ladin de Fascia, vegnarà prejentà la neva esposizion de la sala de Museo dedichèda ai "tempes neves".

L'esposizion met al luster coche la trasformazion fona de la strutures sozièles entravegnuda te l'ultim centenè a portà i Ladins a na neva percezion de sie habitat e a la redefinizion de sia identità. A partir da la "descorida" de la Dolomites da man de studiè, geologhes, etnografes e esploradores, l' nef alestiment met dant testimonianzes, retrac e ogec leé al scomenz del turism e de l'alpinism, fenomen che a partir da l'Otcent portarà al desvanir de l'economia da paura e al svilup del turism de massa.

L'prozess de formazion de na "coscienza identitèra" te la popolazion ladina vegn raprejentà simbolicamenter tras n diorama de gran fazion scenografica, fat da sie manichins zipiè dal scultor de Ortije Filip Moroder Doss, che porta dant l'evoluzion de la mondura ladina tel Nefcent, canche l' guant da festes tradizionèl scomenza a esser durà desche element distintif de partegnuda e donca codificà enca desche mondura

di gropes de folclor.

La seconda pèrt de la sala mena dret te la dimenjon d'aldidanché e tel rich mond olache anchecondi se palesa l'identità ladina anter tradizion e globalisazion: èrt, mùsega, letradura, teater. Chiò, tel nef spazie pissà dai architec Weber e Winterle, fèsc bela parbuda la operes de doi artisè visui d'aldidanché: "La Mort e la Meseria", lurier de la canadeisa Althea Thauberger per la mostra internazionèla "Manifesta 7", e "<Turism\_Ambient>", del fascian Claus Soraperra, ispirèda a la fotografies de Franz Dantone Pascal; operes emblematiche che porta dant na letura del dut personèla de la tradizion ladina, la pruma filtrèda da na stilisazion estetica refinèda, la seconda proponeta a na vida più ironica, scinamai autocritica.

Amò apede cater neva postazions multimediales dèsc l' met de se arvejinèr al rich chèder de la produzion culturèla ladina d'aldidanché, olache l'identità ladina del mond de anchecondi se palesa e seghita a troèr neva formes. L' nef alestiment é avert al publiche a partir dai 10 de december. L' Museo Ladin de Fascia é avert dal mèrtesc a la saba da h. 15.00-19.00.

## Assegnes de studie dal Comun general

L'é temp per fèr domana enschin ai 20 de december

L'Comun General de Fascia, aldò de l'articol 72 de la L.P. dai 7 de aost del 2006, nr 5, met a la leta di studenc che é residenc ti Comuns de Fascia, che fèsc l'prum e l'second livel de istruzion e formazion, che à i requisic pervedui, assegnes de studie e didamenc per l'viac per l'an de scola 2011/2012. La domanes les cogn vegnir portèdes dant alò dal Comun general de Fascia a Poza dant da les 17.00 de en mèrtesc ai

20 de december del 2011.

Copies del bando e di modui de la domanes i é la leta sul sit internet del Comun general de Fascia [www.comungeneraledefascia.it](http://www.comungeneraledefascia.it)

Per de altra informazions se pel se oujer alò da l'Ofize Istruzion del Comun general o ai numeres 0462-762158 e 0462-764500, dal lunsch a la jebia da les 8.30 a les 12.30 e da les 14.00 a les 17.00, de vender da les 8.30 a les 12.00.

## N assistent cultural per l'ICL

L'é temp enschin ai 28 de december per portèr ite la domana per poder tor pèrt al concors

L'Istitut Cultural Ladin fèsc a saer che, aldò de la delibera del Consei de Amministrazion n. 39 dai 21 de november 2011, vegn metù a jir n concors publiche per ejames per tor sù a temp indeterminà personal de la fegura profesionèla de assistent cultural/informatiche, categoria C, livel de basa, 1^ posizion de paament del ruol unich del personal de l'Istitut Cultural Ladin. Per poder tor pèrt al concors, estra che i requisic de lege, vegn domana l' diplom de scola auta. La domanes de

amiscion al concors, metudes jù sun papier scempie, cognarà ruèr ló da l'Istitut Cultural Ladin a Sèn Jan, strèda de la Pieif n. 7 a Vich, dant che sie fora les 17.00 dai 28 de december 2011.

Per aer copia integrala del bando de concors e de altra informazions sun chest argoment se pel se oujer al Secretariat de l'Istitut (tel. 0462/764267 - fax 0462/764909) o ge manèr na e-mail a la direzion: [info@istladin.net](mailto:info@istladin.net)



Enca n muie de joegn à tout pèrt a la scontrèda.